



**TAPAK 8**

**International Criminal Court-i  
Uganda LRA lenir Ongwen aitsü**

**TAPAK 10**

**Australian Open renemer  
aliba ama asayatsü: Craig Tiley**

**VOL. XVIII NO. 112 (ADOK 112) DIMAPUR**

**ROGONÜ (FRIDAY) TSÜKLAI (FEBRUARY) 05, 2021**

**₹ 5.00**

**Nagaland nung nisung tasen pezü dak COVID-19 putet**

**Dimapur, Tsüklai/February 04 (TYO):** Nagaland nung Brehostibarnü nisung tasen pezü dak COVID-19 puteta tang tashinung iba tashidak agi state nung nisung 12,121 meneper alitsü aser nisung trok taneptsü ngua tang active cases 63 alitsü.

Kohima nung nisung asem aser Dimapur nung nisung ka dak iba virus ya jangjatet aser taneptsü angur ajak agi nisung 11,821 alitsü, ta Director, Health and Family Welfare, Dr. Denis Hangsing-i ashi.

Tang tashinung iba tashidak agi state nung nisung 88 süogo aser iba tashidak agi meneper

nisung 149 tashi danga state temi ogo, ta pai ashi.

COVID-19 jangjateta alirtem rongnung nisung 5006 bo tsüngsü pua aoba mapang putetba, armed forces personnel 4,674, danga state tem nungi meyipa shilanger nisung 1,868 aser frontline worker 573 alitsü, ta ashi.

Tang iba tashidak agi menepa alirtem rongnung nisung 8 dak iba tashidak yimya terara ajiteter aser nisung 55 asymptomatic lir, ta Director-i ashi.

State nung tang tashinung COVID-19 tashidak alitsü südi ta temolung melemi bilemba sample 1,25,521 tendangogo.

**Dimapur DC-i departments dang vaccination tesem shimtsü tuyu**

**Dimapur, February 04 (TYO):** Dimapur Deputy Commissioner, Rajesh Soundararajan, IAS-i tim departments dang February 9 nü coronavirus vaccination tanabuba shilem agitsü atema technical nungdakterem apir session sites shimtsü tuyuogo.

Brihostibarnü Dimapur District Task Force senden nung jembidang Rajesh-i tim departments dang February 5 tashi nungbo CMO office aser District Immunization Officer den longjemer session sites shimtsü aser February 7 tashi nungbosa vaccine agitsüpur tenung upload asütsü metetdaksü.

Vaccination team dak alia Deputy Commissioner-i police, Home guards, Prisons aser tim departments dang security aser tzüüng-ozüing tensa densema iba dak sendakba onüktem atema inyaksü metetdaksü.

Kasa senden nung District Immunization Officer Dimapur, Dr.Rebecca-i, tang tashi nung health workers 1,116 nem vaccine agütsüogo aser tang tashi nung Adverse Events Following Immunisation (AEFI) ka danga mali, ta metetdaksü.

COVID vaccination indang olulu prokba dak sendakba nung Dr. Rebecca-i District Task Force züngsemtem dang nüburtem nem awareness agütsüsü mepishiba den külemi vaccine agütsüba ajanga polio aser small pox ama tashidak balala samatsüba indang atishia metetdaksü.

Medical science-i meimchir nem agütsüba sempet tulutibatam rongnung vaccination densema lir, ta shia Dr. Rebecca-i, "Osangtsüsang tai amangba dang nungibo asenoki tenük agi anguba aser ajangshibatam ang amangtsüla," ta ashi.

**LLRPO-i Foothill Road tekeraba nung renemtsü ajungshir**

**Dimapur, Tsüklai/February 04 (TYO):** Naga nung asoshi kanga tongtipang lenmang, Foothills Road, koba tajungba kumdakja Trans Nagaland Expressway ta nungja melenshir New Delhi nungi iba project tulu sangdongtsü atema atatepa lir, iba atema Chief Minister Nephui Rio aser Deputy Chief Minister Y. Patton na kübok aliba PDA sorkar dang pelar, ta Lotha Lower Range Public Organisation (LLRPO) ajanga sangdong ka nung metetdaksü.

Tizit nungi Khelma sendaktepba lenmang ya Nagaland anüolen aser anüdoklen tsünga sendaktepba ka alitsü, aser iba "Historic Naga Economic Road" project ya renemba sülen Nagaland state telungzük nung lenmang tulutiba aser talangtuba akumtsü, ta sangdong ajanga ashi.

Sangdong ajangasa ashiba agi, Nagaland Foothills Road Co-ordination Committee (NFHRCC) ajanga meranga inyakba atema

tenügang agütsür, shirnoki 2013 küm iba Naga nung mangdang project ya animesor tenzüka liasü aser tang tashi iba otsütsü mapa asangsang kumdaktsütsü atema tentet balala ajungmesoa aruba atema pelaba lemsateper.

Tesendaktep tajungba akumtsü aser gari senzütettsüsa kumdaktsütsü mechi February 5, 2021 nü Hotel Japfu, Kohima nung Nagaland Foothills Road Co-ordination Committee ketdangsiiba nung MLA ajunga aser Tribal Hoho 11 den shisatokten senden ka amentsü aliba ka nungdakba mera ka lir, ta LLRPO tir Nongothung Yanthan aser tongti zülur Francis Kikon nati sangdong ajanga ashi.

Iba mapa tajung nung LLRPO sarasadem aser shisatsü dena lir aser aser Naga nung ajunga atema iba mapa tulu asangsang kumdaktsütsü asoshi ozüing yanglurtemi maneni temerangba inyaksü ajungshir, ta LLRPO sangdong ajangasa ashi.

**Loktiliba lirumedema aotsü atema arok shisatsü nungdaker: CM Rio**



**Hotel Vivor, Kohima nung February 4, 2021 nü Nagaland Chief Minister Neiphiu Rio aser tongtipang nisungtemi 21 buba North Eastern Regional Power Committee (NERPC) senden tenzükdang temo milen tsüklokba noksa nung angur.**

**Dimapur, Tsüklai/February 4 (TYO):** 21buba North Eastern Regional Power Committee (NERPC) senden February 4 nü Hotel Vivor, Kohima nung kaogo. Iba senden nung North- Eastern State tem nungi Minister tem, Centre aser state sorkar aser State Power Utilities ketdangsiirtem denaliasü.

Senden nung o jembiba mapang Chief Minster Neiphiu Rio-i, North East tesem ya yimden yimsüsüba tsütsü mepetmesü, social geography aser ethnic consideration ajanga kümtetba sülen aser tanü tashi shidakba terenlok majangshi lir, ta ashi. Rio-isa, linük rongsenketsüing nung renloka aoba tajangzük ya North East nung ano terenlok makai aliba state tilatem den lemsatepsüla aser North East tesem lenla ajak nung renlokba sülenang India ya linük ka ama terenlok akaba linük ka ta züngshitetsü, ta ashi.

Rio-i, Power sector ya kanga tebenja sector ka lir aser commercial tenungdakba aser lokti nem telangzüba agütsütsü aliba na tsünga liromedem adokdaktsütsü asoshi arok shisatsü nungdaker ta ashiba den, NERPC ya iba amala ken o benoka sensak asemtsü atema sabang tapet lir ta ashi. NERPC-i, NER power system operations tali tajungba kümdaktsütsü aser ajaki tozüksüsa kümdaktsütsü asoshi maneni inyaka arudar, ta ashi.

Ministry of Power, Gol-i achaayanga POWERGRID kübok NERPSIP (North East Region

Power System Improvement Project) amala World Bank-i senotsü agütsüba project tem benoka inyakba project tem ajanga North East State ajak ajangzüksü, ta pai ashi.

Maneni pai, iba project ajanga tang kanga nungdaka aliba Transmission lines aser Sub-stations tem tesem aika nung yanglua arudar, ta ashiba den POWERGRID dang NERPSIP indang Tranche-I nung maparen takaraba nungi inyaksü mepeshi, kechiyong mapa tembanga inyaksü atema atakzükja aliba mapang süiogo aser maparen kara minyakra Tranche-II benoka inyaksü asoshi sanction menotsü.

NE Region nung power projects tem timba hydro based project tem lir aser lisa mejangjaba ajanga hydro projects tem benoktsü menor aser iba yagi tariff tali timba akümer, ta pai ashi. Ajisüaka power generation atema Hydro projects tem asoshi lenmang tesadamba lapoka lir asünung pai iba mapa achaayangba telok dang project tem mapang shidak nung benoktsü atema takok tashi inyaksü mepeshi.

Nagaland nung power jenjang indang jembidang pai, power sector nung System aser Market operation naprongla atema Reliable Communication kanga tongtibang lir. Ajisüaka Nagaland nung 66 kV systems, koba Intra-State Transmission system shilem 60 shi lir, iba ya central scheme balalai setoka toktsüogo aser iba ajanga Intra-State Transmission

system junga anepalu mesüteter, ta Rio-i ashi. Pai forum dang PSDF kübok iba project nem senotsü teyari agütsütsü asoshi Ministry of Power (MOP) dangi abentsü mepeshi.

Kasa mapang nung Deputy Chief Minister Tripura aser Minister in charge of Power, Jishunu Dev Varma-i ojembiba mapang, NERPC tentetba sülen NRE Power System operations tajungba aser dalangba kümdaktsütsü atema maneni inyaka arudar, ta ashi. Paisa, India aser World Bank-i senotsü teyari agütsüba NERPSIP project ya NE state tem nung intra-state transmission aser distribution system tuluba aser tashi taitba kümdakja power network tajungba amenoktsü asoshi terenlok maparen tongtibang rongnung ka lir, ta ashi. Maneni pai, iba senden nung NE nung power sector dak kongshiba ken o tem aika bentettsü imlaba lemsatep.

Advisor, Power, Tovihoto Ayemi-i, lokti pelaa agizükba o jembiba mapang, 2020 küm atema central sector generation capacity 3000MW ya kanga apara liasü aser ibayongji N.E State tem jenjang tasakba nung Eastern aser Northern grids nungi agitsüsa aküm, ta ashi. Anungji pai, power agi anungba tebilemtsü bentettsü atema Kopil stage I & II aser tang yanglua aliba Lower-subansiri HEPC 2000MW, Dibang Hydro Multi project 2880mw tem asüngsashitsü mepeshi.

*(Maneni tapak 2 nung...)*

**Dimapur nungi Kohima leni atutsü atema lenmang tangaka amshitsü tuyur**

**Dimapur, Tsüklai/February 4 (TYO):** Dimapur district kübok Chumukedima Police Check post aser New Chumukedima village na tsünga NH - 29 (Loc. - 127.00 KM) nung long longzüka aluba ajanga Home Department-i, Chathe ayong apu (Patkai apu) nungi Kukidolong tashi 02.02.2021 nungi osang tejangja ka magütsü tashi shibanga ayuba metetdaksüogo. Yiruyipong, nisung taküm samaba aser osetsüt

raksaba nungi jenboa toktsütsü atema iba jenjang agiogo.

Nisung kar danga light aser medium garitem nung Dimapur nungi Kohima/Manipur tashi onüa lira parnok dang taru tao nung 7th Mile (Chumukedima) - New D.C. office - Shokhuvi - Razaphe - Mhaikam - Pimla - Mhainamtsi - Jhornapani I Medziphema lenmang amshitsü metetdaksüogo.

Temalen shisema aliba lenmang

ya medium aser light vehicle atema dang asütsü. Gari tulutem iba lenmang nung senzütsü memelatsü. Anungji tang atema Kohima aser Manipur-i aoba khu abenba gari tulutem ajak Merapani - Doyang - Wokha (NH-2) - Kohima lenmang agitsü metetdaksüogo. Kasaji Assam anütoktip len nungi Kohima-i aotsü aliba gari tulutem danga kasa lenmang agitsü metetdaksüogo.



## UCTM nung MTh program tasen ka amenok



UCTM Faculty den mendenbuba Rev. Dr. N. Tzudir nung program tasen amenokba sülen tangokba noksa nung angur.

**Dimapur, Tsüklai/February 04 (TYO):** The United College of Theology and Missions (UCTM), 5th Mile Dimapur, aser Martin Luther Christian University, Shillong, Meghalaya na longjemmer tanü February 4 nü College nung "Master of Theology (MTh) in Mission" academic program tasen ka amenokgo.

UCTM Academic Dean Tlemsulemla-i sangdong ka ajanga, academic program ya

UCTM mendenbuba, Rev. Dr. N. Tzudir-i amenoktsü, ta ashi.

Program tasen amenokba mapang Tzudir-i, sentepa aliba lokti ajungshi aser Tsüngrem mulung ji Mission lir, ta ashi.

Kasa sangdong ajanga ashiba agi, iba program ya mission mapa asoshi Arogotem indang biblical, theological, contextual aser cross-cultural praxis dak sendakba specialized training ka agütsütsü asoshi aser Khrista

mesükba lenir/sanüker, missiological thinkers, tesayur aser kaketzülurtem anitettsü atema lir.

Iba course ya 2021 küm June ita tenzütsü renema lir. UCTM-i tejangrartem iba program atema

www.uctmnagaland.com ajanga apply asütsü jaoker. Osang tejangjaba agütsü atema Academic Dean Tlemsulemla den Ph. No. 9856145668 ajanga tongteprateptetsü.

## NBSE ajanga Video Conference agütsü

**Dimapur, Tsüklai/February 04 (TYO):** Nagaland Board of School Education (NBSE) ajanga sangdong ka nung ashiba agi, Board nung register süa aliba rejutem indang tekolakpur den senden ka February 9, 2021 nü video conference ajanga amentsü.

Iba senden nung school management, academic &

examination dak sendakba onüktem jembitsü.

Mapang telemsa yamai alitsü:

1. High Schools (both Government & Private) - 10:00 am to 12:00 pm.
2. Higher Secondary Schools/ Colleges (both Government & Private) - 1:00 pm to 3:00 pm.

Register süa aliba rejutem indang tekolakpur ajak dang iba webinar nung mapang telemsa agüja aliba ama adentsü metetdaksüogo.

Iba senden ya virtual mode nung amentsü aser senden indang ID aser Passcode ya District WhatsApp group tem nung agütsütsü, ta sangdong ajanga ashi.

## Loktiliba lirumedema aotsü ... (TAPAK 1 NUNGI...)

Ayemi-isa, central electricity Authority dang sen crore 13.09 alang PDSF kübok 66kv system sentoka toktsür aliba atema senotsü agütsütsü asoshi special dispensation ka asadangtsü aser 2021 küm February ita common facility nungi Assam tugadokba sülen tawa adokba atema senotsü teyari agütsütsü mepeshi, kechiyong Nagaland-i küm shia crore 3.12 agütsür aser iba den bendenloksema khuret tali mebentettsü. Paisa, iba senden ajanga NE tesem power house ka akümtsü aser power industry ajanga economy

tashitait ka yangertsü atema teyari agütsütsü imlaba lemsatep.

Minister for Power, Law, Forest & Environment, Taxation, Information & Public Relations, Meghalaya, James K. Sangma-i, NERSIP kübok project kar nung Transmission Line amenoktsü atema menoba tuteta ashiba den forum dang project tem agizüktsü atema takaratiba nung lenmang bushitsü mepeshi.

Maneni senden nung MLA & Advisor Power & Hydro Power, Arunachal Pradesh, Balo Raja-i, Ministry of Power, GoI dang

PSDF kübok senotsü teyari agütsüba yimya melenshia 50:50 ratio nungi 100% kümdaktsütsü mepeshi, kechiyong 50:50 ratio ajanga Optical Fibre Ground Wire amenoktsü makoker, ta ashi. Paisa, forum dang melenshir aliba DPR takaratiba nung sanction asütsü mepeshi, ajita asünungdang maparen ka danga bangdaka mayutsü.

Senden nung Member Secretary A. K. Thakur, IES aser Director NERPC B Lyngkhoi natia o jembi aser Principal Secretary (power) K.D Vizo-i tepela anküp o jembia liasü.



Tzüdikong Town leper (Cemetery) nung Urine Shed ka Tzüdikong Town Süngratsü Senso Union-i yanglutsüba 02/02/2021 nung Sarasadema lapokba Sülen Tzüdikong Ad-hoc Town Committee (TATC) pur den parnok Senso Union linirtem agiba noksa nung angur. Kanga nüngtaka aliba metsümeshitak tajung ka yanglutsüba den sen tenla tulu agütsüba atema kangasa pelar ta TATC-i sangtonger

## Deputy Commissioner, Kohima ajanga metetdaksür

**Dimapur, Tsüklai/February 04 (TYO):** Deputy Commissioner Kohima, Gregory Thejawelie, NCS ajanga sangdong ka nung ashiba agi, Kohima-Jessami 2-lane project - Km 29. 60 to Km 37.05 (package-11) ajanga ki-o-jen nung kongshiba/raksatsüba atema kibur nem teyari ya Deputy Commissioner, Kohima indang office nung February 10, 2021 anepdang 10:00 ako nung agütsütsü.

Deputy Commissioner, Kohima ajanga ali kuburtem dang iba anogo tsüngtong arutsü aser parnok den tawa tangokba passport noksa pezü (scan asüba masü), Aadhaar card (Xerox), Identification proof aser Bank Pass book (front page xerox) bener arutsü metetdaksüogo.

Kibur dak alaka dangar shinga nema iba sen-o-tsü tsütatep masütsü, ta sangdong ajangasa ashi.

## NLA ajanga Subordinate Legislation senden atema metetdaksüra

**Dimapur, Tsüklai/February 04 (TYO):** Committee on Subordinate Legislation indang senden February 8, 2021 nü amentsü aliba ya MLA aser Committee on Subordinate Legislation indang mendenpuba Dr. Imtiwapang Aier, ajanga melenshiogo, ta Commissioner & Secretary, NLA, Dr. P.J. Antony-i sangdong ka ajanga ashi.

Sangdong ajanga ashiba agi, iba senden ya February 9, 2021 nikongdang 2:00 ako nung Assembly Secretariat, Kohima nung aliba Committee Room nung amentsü.

Committee on Subordinate Legislation indang züngsem ajungai iba senden amentsü anogo melenshiba ama arua adentsü mepishia metetdaksür, ta sangdong ajanga ashi.

## Wokha nung BBBP kübok angati driving license lemtsü



Feb. 4, 2021 nü MVO Wokha, Masetshilong Longkumer aser EAC (Hq), Wokha, Imtinungla nati driving license agütsüba noksa nung angur. (IA Wokha)

**Dimapur, Tsüklai/February 04 (TYO):** Wokha District Administration & DLCW-MSK (District Level Centre for Women-Mahila Shakti Kendra) den Department of District Transport Office, Wokha longjemmer, Road Safety Month amungba den tenchitepa Beti Bachao Beti Padhao (BBBP) kübok February 4 nü tetsürtem nem angati driving license lemtsüogo.

Iba inyakyim ya 2020 küm October ita tenzük, kong driving license agizüktsü jangraba tetsür/candidate tem züngoksem aser driving class, driving test aser tanga tenüngdakba maparentem atema item beneficiaries tem nem training agütsü aser February 4 nü Deputy Commissioner, Conference hall, Wokha nung tembangogo.

Iba sentong nung Motor Vehicle Officer (MVO) Wokha, Masetshilong Longkumer shisalen agütsür liasü.

Tanü sentong nung ajak senteper smart card 83 beneficiaries tem nem agütsüogo. Beneficiaries tem nem card agütsüba mapang MVO-i, Motor Vehicle Acts aser gari aniba mapang anidaktsü asoshi tetuyuba balala agütsür aliba indang lemsatepba den parnok dang gari anishiba mapang tenüngdakba kuli kaketter teti bener senzütsü ajungshi. MVO-isa, Road Safety month amungba mapang taxi unions aser gari anishirtem atema awareness sentong balala ayongzüka agütsü aser parnok nem road safety indang tangazükba balala agütsütsü, ta ashi.

## Peren District Planning & Development Board senden ayonger

**Dimapur, Tsüklai/February 04 (TYO):** Ita shia amenba Peren District Planning & Development Board (DPDB) senden ya February ita atema Deputy Commissioner indang Conference Hall, Peren nung February 6, 2021 anepdang 11:00 ako nungi amentsü, ta Deputy Commissioner, Peren, Sentiwapang Aier, NCS

ajanga sangdong ka nung metetdaksü.

Iba senden nungya Advisor, Water Resources, Namri Nchang aser Leader of Opposition, T.R. Zeliang adentsü, ta ashi.

Sangdong ajangasa Peren DPDB züngsem ajak dang iba senden nung medema arua adentsü metetdaksüogo.





OZÜI MEIMBA TEMJENBA ONOK NUNGI PILATSÜ ANOGO ISHIKA LIA, PAI ONOK DEN SENSAXSEMDANG, PAI SÜOKI IA INYAKTSÜ BILEMA ALIBA MAPA AIKA LEMSATEPBA RONG NUNG PA TEMANG NUNG TIMTEM AGI TONGER ALIDANG PA TASÜ ITDAKJA SARASADEM ASER LENMANG BALALA NUNG YARITEPERTEM SHIA DANGI PELABA SHITI ZÜLUTSÜ SENTONGA LIASÜ. PAI INYAKTSÜ BILEMA ALIBA MAPATEM RONGNUNG TONGTIBANG KA JI IBAJI LIASÜ. KECHİYONG PA TIMTEM MAPANG TEMEIM AGI YARITEPERTEMJI NISUNG AIKASA LIASÜ ASER IBA JAGI PA MULUNG NUNG MESEMI TESÜNEP ASER TEIMLA AGÜJA PELADAKTSÜ. PAI TESÜSA ASER TONGTIBANGSA INYAKNÜA BILEMBA SENTONG AMAJI, ONOKI SARASADEMA NENOK AJAK DANG PAI KANGASA PELABA METETDAKTSÜR. NENOK TEMEIM MAPA ASER SARASADEM AGI PA MULUNGJANG NUNG KANGA KONGSHIA PELADAKTSÜOGO. PAI INYAKNÜA BILEMBA MAPA KA, PA TENÜNG NUNG, TANÜ, ONOKI NENOK NISUNG SHIA DANG KANGA PELABA IBA OSANG AJANGA LEMSATEPBA YA IMLIBILEMA AGIZÜKANGMA. NENOK TEMEIM MAPA TULU AGI OZÜ TEMEIMTIBA OBALA. KINUNGBO, JABASO ASER ODILA TEMJENBA YARIBA AGI, ONOK MULUNGJANG NUNG TEPELA TESÜNEP TULU LIR. ONOKI NENOK AJAK DANG KANGASA PELAR. NENOK NISUNG KANGA AIKATI PA KANGA MEIMA YARIBA METETA, IBA JAGI ONOK MULUNG ANISÜNGZÜKER.

*Lemeim TEMJEN TOY'er kinungertem*

## Rajya Sabha bye-election Assam nung March 1 nü agitsü

**Guwahati, Tsüklai/February 4 (Agencies):**

Election Commission of India (ECI)-i Brehostibarnü sangdong ka ajanga, Rajya Sabha (Council of States) nung meden tazüing ka aliba süngdaksütsü asoshi Assam nung March 1, 2021 nü bye-election agitsü, ta sangdongogo. Biswajit Daimary-i mapa toktsüba sülen menden tazüing adok.

Biswajit Daimary, shiba Bodoland People's Front (BPF) lenir liasü, pai Bodoland Territorial Council (BTC) election matong tsüingda Bharatiya Janata Party (BJP) nung adentsü telemteba agiba sülen MP mapa toktsü.

Assam nung Rajya Sabha menden ya 2020 küm November 21 nü nungi tazüing lir. MP term ya 2026 küm April 9 nü tembangtsü.

Election Commission sangdong ajanga ashiba agi, bye-election atema osangtem February 11 nü agütsütsü.

Kasa mapang nung election nung tokteptsü atema tenüing züingoksemtsü asoshi tatembangbuba anogoji February 18, 2021 asütsü atakzüksüogo aser nomination papers tem February 19 nü asadangtsü. Candidatures agintsü atema tatembangbuba anogoji February 22 nü asütsü.

### AJP, Rajor Dal na taruba elections atema longjemogo

**Guwahati, Tsüklai/February 4 (Agencies):** Assam nung taruba Assembly Election atema Assam Jatiya Parishad (AJP) aser Rajor Dal na longjemogo.

Temetetsükaji AJP aser Rajor Dal na prongla ya Citizenship Amendment Act (CAA) anema nokdakba sülen tentet.

AJP tir Lurin Jyoti Gogoi-i, Rajor Dal tir Akhil Gogoi den ajuruteba sülen Brehostibarnü party ana longjemba osang sangdonga liasü.

"Taruba election nung AJP aser rajor Dal na senteper Assam nung national party aser parnok den longjemer aliba party tem den tokteptsü," ta AJP tir Luri Jyoti Gogoi-i ashi.

Züingsem 126 atema Assam Legislative Assembly election taküm April aser May nung agitsü lateta lir.

AJP aser Rajor Dal natisa, state nung Congress-i aniba Grand Alliance nung parnok madentsü ta jangjatsüogo.

AJP aser Rajor Dal na longjemba sangdongba sülen Assam Assembly Elections nung party tongti asem tokteptsü.

BJP den AGP aser UPPL külen asütsü aser külen AIUDF aser party 4 densema Congress-i aniba Grand Alliance asütsü.

AJP-Rajor Dal longjemba ajanga party tasembuba adokogo.

Ajisüaka AJP tir Lurin Jyoti Gogoi-i ashiba agi, election ya party asem masü saka ana tsüingda asütsü, koba Regional party tem aser National party tem asütsü.

Maneni atakzüksü aliba anogo vote agütsüba maparen anepdang 9:00 ako nungi tenzüksü aser nikongtsütsü 4:00 ako nung tembangtsü. Vote tem March 3 nü azüingtsü, ta EC-i ashi.

EC-isa, election mapang nisung ajaki anidaksü atema tetuyuba balala agütsüogo.

Tetuyuba nung, Election dak sendakba maparen ajaka nung nisung ajak face mask asemtsüla.

Election maparen atema hall/takdang/premises-i aiba mapang nisung ajak thermal scan asütsü aser item tesemtem ajak nung sanitizer toktsütsü.

Tang state sorkar aser Ministry of Home Affairs (HMA)-i COVID-19 dak sendakba nung benoka aliba guidelines dak ajemdaker inyaksangshi ajak tetsüingda ita inyaksangshitsü, ta kasa sangdong ajanga metetdaksü.

EC-isa, election atema maparen balala achaayangba mapang COVID-19 tashidak azüoktsü atema jenjang tapet agitsü asoshi Assam chief secretary dang state nungi ketdangsür tejen ka shimtsü tuyuogo, ta ashi.

Maneni Commission-isa, bye-election atema observer asütsü asoshi Assam chief electoral officer shimogo.

Form No. 3

[See Regulation-15(1)(a)]

**DEBTS RECOVERY TRIBUNAL GUWAHATI**  
Suwarna Bhawan, House No. 12, New Town Path, Near Hanuman Mandir, G. S. Road, Ulubari, Guwahati-781007 (Assam)

Case No.: OA / 252 / 2020

**Summons undersub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.**

Exh. No.: 869

**CANARA BANK**

-VS-

**MESSERS CITY MAGIC MOBILE SHOP**

To,

(1) **Mr. Akhter Rabbani**, resident of Luhi Apartment, Opposite ABC Building, Kharmahal, Dimapur, Nagaland-797112.

**SUMMONS**

21.09.2020 nü akhümtsüba aliba Presiding Officer tsüingda OA/252/2020 benok. Tribunal-i iba Application atema summons/notice Act, (OA) nung section 19(4) kübok **Rs. 95,06,969.86/-** sentsü agütsütsü atema ana anema ken o benokogo. (application den documentsenoksemalir). Act nung section 19 nung sub-section (4) den liromedema, defendants nem yamai tetuyuba agütsütsü:-

- service of summons agütsüba sülen anogosemertsüingdanenoknem kechiba teyarimagütsütsü;
- original application nung serial number 3A kübok applicant-isha aliba rongsen aser kimunglumung metetdaksütsü;
- original application nung serial number 3A kübok agüja aliba rongsen aser kimunglumung meyokdoksütsü metetdaksütsü, ken omangadangtashiiba ya meinyaktsü.
- Tribunal nung temelabamagii original application nung serial number 3A kübok agüja aliba rongsen aser kimunglumung mayoktsü, tangar nem magütsütsü;
- rongsen aser kimunglumung yokdokra, ibanungi anguba senotsüjibank mesüra financial institutions nung lapoka aliba account nung enoktsü.

Tezuluba ka zülutsü aser **25.02.2021** anepdang **10:30 A.M** nung Registrar dangi arutsü tetuyuba agütsütsü, ibaji meinyakrana meliaka application ji benoka angadangtsü aser telemteba agitsü.

**Given under my hand and the seal of this Tribunal on this date: 22.01.2021.**

Registrar,  
Debts Recovery Tribunal, Guwahati



**COME ONE, COME ALL**



Do visit us at the  
**SPECIAL HANDLOOM EXPO**

AT URBAN HAAT, DIMAPUR

From : 28/01/2021  
Time : 10:00 a.m to 5:00 p.m

PARTICIPANTS FROM VARIOUS STATES OF INDIA.  
A MEGA EVENT OF EXCLUSIVE RANGE OF HANDLOOM PRODUCTS,  
DAY TO DAY UTILITIES & DECORATIVE ITEMS, INNOVATIVE &  
WELL DESIGNED LADIES & GENTS WEAR, TRADITIONAL SHAWLS,  
JACKETS, BED SHEETS, CUSHION COVER, CARPETS,  
HANDICRAFT ITEMS, BASKETRY ETC.....

ENJOY THE HANDLOOM COLOURS OF INDIA



ORGANISED BY:  
Nagaland Handloom & Handicrafts  
Development Corporation LTD  
(A Govt. of Nagaland Undertaking)  
Dimapur : Nagaland



SPONSORED BY:  
Office of the Development Commissioner  
for Handlooms, Ministry of Textiles,  
Govt. of India, New Delhi







## TIR YIMYIM YIMOBILEM (EDITORIAL)

DIMAPUR ROGONÜ, TSÜKLAI (FEBRUARY) 05, 2021

### ASENOK YA KECHI INYAKA AMONGER ?

**N**agaland state kümli aritepa gari lenmang yanglu, government school lapokyonga ao, district headquarters aser sub-division ajak nung government mozü ki lapok aser yimtsüngtem tashi electric light tsükloktüsüonga ao. Kopi melii Tuli nung paper mill lapok, Tizit nung plywood factory amenok, Dimapur nung Sugar mill aser Longnak nung süngjanglijang menünga tzü agizükba Fruit Canning Industry tenzük. Item ajak nungji inyaksüsa pei pei yari Naga nung aika government mapa angu aser Nagaland state-ji repranga lia kanga karaa renloka aotsü tenzük. Ajisüaka, ajungbenaka, tanurbo tajung aso ser nung inpet ama, Nagaland nung lapokba government school aika nung tazünger mali azüngazünga aküm, government mozü kidang mozü dang masü saka teyaritepertema mengui küma ao aser electric light methitemi peria tsüklokba agi amang sangwa memetet teti sangwaa alitsü melen, light junga maruba agi industries timtemba otsüjibo yutsür Photostat dokan dena takoksa angur. Aji oda, joko paper mill, sugar mill, plywood factory aser fruit canning industry-tem lapokba mapatem to Nagaland nung atalokba tar nung otsüang mesüka kümogo. Aji oda, tasentasen aser tuluba-tuluba aser tajungba-tajungba lapokyonga aotsü melen Nagaland state akümdang yangluba gari lenmang aser kiojentema anepalu mesütet aika menendokogo aser aika telaor lir . Joko, gari lenmang aika nung lenmang tiyong nung süngdong tululu meya lir aser tang tesenzüdak lenmangtem aika kor dena mejajatetsüsa lenmang agi lenmang memesük kümdagi. Item tensa tia angudang, asenok küm papikaya election agili, government kümli aser tatar senden nung terenlok mapatem tapu balala inyaksü asoshi senotsü sentong yangluli aser terenlok mapa tajungba inyaksü nükjidong nung department tali-tali küma bendangli ta kanga mazüngi inyakteper amato ketdangsertem jembiba angashibato, shitakba nung asenok ya asen meyong Secretariat, Directorate aser Division office-tem nung kechisa inyaka amongba agi mazüngar na ta temulung tipmedemi bilemer. Lia lia Nagaland tazüng kümogo. Tangar company kati Univeristy lapoka iba kübokji Medical, Engineering, Management, Rural & Urban Development college tapu balala lapoka post graduate aser specialist aser doctorate jenjang tashi agüja pei lima asoshi lanurtem arangshidaksür. Iba denji kodang asenok medemdangdir, state government kati kümsülosü nung medical college kata melapoktetter aser Engineering college lapoktsübo pongmang. Asen lima nung item technical education mangubajibo yutsür, tangar asen lima bushia arua azüngtsü melen, taaktsüka, asen chirnurtemang Arts aser Science azüngi dena tanga state bushia aor. Item ya bilemdangdang, asenok ya kechi state aser asenok ya government office-tem nung kechisa inyaka amonger aser kechi inyakba agi government mapa nung inyaktertem ita sen paikaya endoker ta mebilemli asüyonga temulung rongga bilemer. Aji oda, state kümer küm 60 nunga foothill lenmang tatsüka ya meyanglutet yamai nübortem kangshiba agudang, asenok ya taoba küm roker nung kechisa inyaka liasüar na ta sükdangnua aiter. Akok ka asübo, state kümli nungi government ita sen agia government tenzükba aser küm roker government nung alidang agiba sen ajak to meyipa agütsünütsüka bilemer. Jungjunga bilemdangra, taoba küm roker asenoki yimsüsüa aruba aser ketdangsüa inyakba mapatem to tiyazü nung tiaksanga nübortem sen agi asüküma kazüa senzür amaika dang liasüa ta bilemer. Aji oda, tang yabo taoba mapang nung inyakba mapatem ajunga nung tejang danga achiba mapang ka asütsüba ser nung, terenlok süngdong ajak tejang medangjungi dang süadokogo. Atangji, alima nung alir asünungji pei agitsü inyaksübaji kanga tongtiband. Aji oda, pei ki, pei lu aser pei meyong hon taribi aser rongsen aika pei merang- meranga inyaka bendenbaji junger. Idakji asen dang masü tangar-a nisung aika anisüngzüksü. Ajisüaka, asen kibo tajung saka asen government school kibo majung, asen lenmangbo junger saka yimkong lenmang majung, asen garibo junger saka nübortem senzüba bus-bo majung, asenbo shirangdang private school nung taneptsü ngutetter saka nübortembo government mozü kidang taneptsü mengutetter, asenbo organic dang bushia achir saka nübortembo relief jang alitsüa matur, asenbo tayimtsü nung mesüra sepai peria anir senzür saka nübortembo Assam bandh aliba agi mesenzütetter ta aliba tia ya asenoki mereprangtetra, atangji, asenok teinyaksü kecha makatsü. Ashiko, tang tashi Nagaland nung terenlok mapa inyakba mong makaba ya meinyaknuba agi masü saka nüborem atema mapa inyaksüba tesem aser nüngdak mereprangtetba agi, pei kisüng agitsü inyaka atar asütsüa akok. Yamajika masü nungbo, tama raktepa motzü ajak seplokja aser auyi ajak ponglokja ola tapu tapu adoka oli aruli senzüba ajak ya amajok nung nübortem rongsen chitsür dang asütsü. Joko, asenoka asen lima ajungtsü atema kechi inyaksü aser kechi inyakar, aji meteta inyaka amongtsüla.

## OLEMSABANG MONGPU TATSÜ

~C. Lima Ozüküm, Mongsenyimti

Süngkopok Yangyang Ola  
Sünepa tochi agütsür  
Lashir Ita Petinu sentsü  
Samatsü amang tsübu  
Tekipang nung kijoki  
Merametena asaloktsür  
Pa ah Teyanglur sentong  
Penzüa dang tzüin tzü  
Nabo kü nük shi-itdak  
Oh! Jalibulisang Tsüngrem  
Teti ya kü lima sünüali.

Melishir ya li nung  
Mongputemi kü nük matur  
Tsüngküm mesüi liangmano  
Meyiwa süngo lanu  
Mangkonang mulungnetdak  
Metsü mapang nükla talang  
Alimar mongpu tatsü  
Arü mekih ka dang  
Tenük mulongshi jungi  
Süitema oa adoker  
Ne den ni alangyuh dang teküpokba.

### - Yimozülur dangi -

#### Dimapur nung Auto Para ya shibai latettsü?

Sir,

Dimapur nung anogoshia bazaar, office aser jila nung senzütsü asoshi Auto rickshaw teyari medeni jajatsü makok. Aji süaka nüburtem aliba agi dang auto wallaji ayangtsü ngua alir aser parnok aliba jagi nüburtema mapang balala nung senzusempongtsü teyari ngua alir. Anungji iba maparen nung telok anaprongji kasasa tongtiband lir. Saka repranga arunung aiben auto anishirtemi nüburtem lenjii aruba mali ama ajangshir. Mapang balala nung bangdaki auto fare latettsür aji saka parnoki aiben yangji manidaker aser meyiper bandh dena ayongdi asür. Tanü asünga reprangdangra lockdown ya lapoka ao tashi nung auto para/hire charges ya parnok mulung agi aiben meshir aser iba jagi public timatemer. Anungji iba tebilemstü ya bangdaki khien kanga junga repranga azüok nungang jungdisu ta anogoshia auto nung jajar public tenüng nung lemsateper.

- Mr. Rongsen, Dimapur (a concern citizen)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



## India nung Catholic Khristantemi aluyimertem pusemer



New Delhi nung aluyimertemi longkak aitba mapang nung Catholic Khristantemi parnok ajurudang tangokba noksa nung angur.

**February 04, 2021:** India nung Catholic Khristan tentet tulubai Delhi nung longkak aiter aluyimertem pusemstü tenangzükba agiogo.

Asia nung Catholic Forum tulutiba-All India Catholic Union (AICU)-i, par züngsem-a meyrjang aika tzük-lu, coffee, narikol, kozü aser aonsotsü balala lu ayimer, ta metetdaksü.

AICU Tir, Lancy D'Cunha-i sangdong ka ajanga, "Anungji onoki tamangba yimsü balala nungi süaka aluyimertem, angopurtem aser factories nung inyakertem ajak pusemer. Linük atema chiyongtsü züsentettsü asoshi aluyimertem asen-tzü sendoka kanga anibeleva inyakba jenjangji onoki angateta lir," ta metetdaksü.

Europe aser tanga linük balala nung sorkartemi aluyimertem akhümtsübu aluyimertem nem subsidies aika agütsür, ta sangdong nung shia lir.

Centre sorkari aluyimertem longkak aitba nokdangtsü merangaka aluyimertemi February 6 nungi tenzüka India linük tesem ajaklen lenmang mokdanga longkak tesashiba

aittsü sangdongba sülen AICU-ia iba sangdong agütsü.

Yaküm November 29 nungi tenzüka Punjab aser Haryana na densema state balala nungi aluyimertem New Delhi arrtsülen adenshia Centre sorkar dang aluyimba özüng tasen asemprongla agienang, ta takhanga agüja arudar.

Aluyimertemi ashiba agi, parnok longkak aitba tesem nungjagi ainshidaksütsü atema sorkari tzü supply, light aser internet services ajak anentsüba den külemi aluyimertem Delhi telungi aiba nokdangtsü atema lenmang nung jara yangluba den külemi merang agi atsü atsüdar.

AICU otongdar, John Dayal-i, "Aluyimertemi tesünap nung longkak aiter, saka mitkartemi tashiyim amshir. Sorkari nüburtem dang nungi saru agiba sen jenti amshia gari lenmang nung ongken atur aser lenmang nung kojat angüna yutsür. Item mapaji mitkartem aliba tesem mesüra kiralongrartemi timtem agütsüba tesemtem nung ang amshir," ta metetdaksü.

January 26 nü Republic Day anogomong nung aluyimertemi

tractor rally agidang rara adokba sülen sorkar aser aluyimertem tsüngda melung melemtep taliba kümogo.

AICU otongdarisa, "Aluyimertem ya kiralongrartem masü mesüra lokti anemertem masü. Parnok ya asenok mesürtem, anungji parnok dang yamai mebenshitsüla," ta ashi.

"Item özüng tasen ya sorkari aluyimertem ajungtsü atema benok. Ajisüaka aluyimertemi item özüngji maginüra sorkari tanaben shisadangtsüla," ta Khristan tentet, Rashtriya Isai Mahasang nung otongdar, Richard James-ia metetdaksü.

"Nisung ajak ajangzüktsü atema sorkari item özüng agientsüla aser aluyimertem longkak aitba anendaksütsüla," ta pai ashi.

"Aluyimertemi akhangbaji mataloktsütsü, ta sorkari tekong merangra tajung kecha mataloktsü. Ibaji ajanga linük dang tashi meitdaksütsü. Aluyimertem longkak aitba nokdangtsü atema sorkari senotsü jenti indokdar," ta Khristan lenirisa metetdaksü.

## ANOGO ABEN TSÜNGREM DEN

### Sannüker den taküm

T. Ken 23:1-2

San ka ama taküm aliba agi ne mulungjang nung tepela tulu agütsütsü. Parnok kechi chiyongtsü nüngdaker aser kechi agi parnok yirutsür pai metet. Kodang parnok chiyongtsü aser kodang parnok tzüraba süngzüktsüla pai metet. Sannükeri longren metet aser chiyongtsü aser tzü tajungtiba alidak metet. Santemi Sannüker anidakba ali tashi parnoki parnok nüngdak ajak mapang shidak nung angutsü. Parnok sannükeri pa akaba tajungtiba agütsütsü.

Nai Sannüker tajung dak temulungjang ajunga agi amanger asü? Nai alima chiyongtsü dang nungi Pa nungi anguba chiyongtsü züngshir asü? Ne nüngdak karbo Tsüngremi soetatoktsü ta nai shisabulur asü? Tenüngsang Ken züluri pa kechi agi manüngtsü ta angatetta liasü. Pa yimya agi Sannüker Tajungi pa santem anebalur aser parnok asoshi taküm yutsür (Yn. 10:11).

Nai ne nükrangdong Sannüker dang nungi pilar Sannükeri kechi agütsür iba nung rangloker asü? Na anüng-akonga lira aji Sannüker ne nüngdak magütsütetter masü mesüra abensa magütsüner masü mesüra abensa magütsüner masü, Pai agütsüba ajak agizüktettsüsa ne tamang maliba agi asütsü akok. Ne Sannüker agi agütsüba agi nai temulung masütsü akok asü? Sannüker nungi aruba tepela nai magizüki ali asü? Ne nüngdak Pai dang ne taküm nung agütsütsü akok agizüktsü asoshi Pa dangi meyipang.

## Fulani kiralongrartemi Southwest Nigeria nung pastor ka khaset

**JOS (Nigeria), February 04 (Agencies):** January 16, 2021 nü southwest Nigeria nung Fulani Muslim kiralongrartemi pastor ka khaset; pastor Amos Arijesuyo ya university ka nunga professor teinyakdak liasü.

Christ Apostolic Arogo nung pastor aser Akure, Ondo state nung aliba Federal University of Technology (FUTA) nunga professor, Amos Arijesuyo, Ibadan nungi Akure-i meyipa aoba mapang nung Fulani telungpurtemi pa indang gari nung injang khaloktsü, ta Federal University nung otongdar kati metetdaksü.

"Nikongdang 5:30 ako meta Fulani telungpurtemi gari lenmang nung mendanger pastor amak. Kiralongrartem jagi pa indang gari nung injang aika khaloktsü, aser tia makai injang kari Dr. Arijesuyo aser pa indang gari anisang na dak khashi," ta university deputy


director of corporate communications, Adegbenro Adebajo-i sangdong ka ajanga metetdaksü.

Gari anisang jagi medical teyari bushitsü atema gariji kera anir ao, ajisüaka Arijesuyo meküzmzükteti asü, aser gari anisangjibo hospital ka nung mongdar, ta Adebajo-i ashi.

"Aniversity administrator aser counselor tajung ka anojungi tepsetba atema university-i sashia aitsür. Dr. Arijesuyo asüba ya FUTA atema dang masü saka Nigeria nung shisashirtem atema takoksa tulu," ta paisa metetdaksü.

University ketdangsertem, staffs aser kaketshirtemi security agencies dang aibelenertem pua tapet temerenshi agüjang ta akhanger, ta paisa ashi.

"Onoki pa kinüngtsü, chirnur aser kibong züngsemtem atema



Christ Apostolic Arogo nung pastor Amos Arijesuyo

sarasademtsür aser mangyim jashi lemsateper. Iba takoksa tizüktettsü atema Kibubai parnok nem tesünap agüjang ta onoki sarasademtsür," ta Adebajo-i lemsateper.

Osangbener den jembidang Christ Apostolic Arogo nung züngsem, Joseph Ayodele-i, "Pastor ba ya professor ka liasü, tekolok kanga techira aser Tsüngrem meimba nisung ka liasü," ta ashi.

Yaküm (November 2019-October 2020) alima nung

Khristantem timba tepsetba linükji Nigeria liasü (Khristan 3,530 tepset), ta tawa Christian support organization Open Doors' 2021 World Watch List report ajanga sangdonga liasü.

Yaküm Nigeria nung Khristan 990 tashi puer ao aser alima nung Khristantem tamajungtiba reshikangshiba linük rongnung Nigeria jenjang 12buba nung aliba tangbo jenjang 9buba kümogo.

Nigeria kübok Kaduna state nung January ita kija nungi Khristan 26 tepsetogo, ta osang ka ajanga metetdaksü.

January 21 nüa Fulani kiralongrartemi Khristan nütsüng timba aliba yim, Baranje amakdang Khristan pezü tepset. Iba jakdang Kaduna State nungsa Khristan pongu tepseta liasü.

January 12 nüa Kauru County kübok Kizachi yim amakdang Khristan ana tepset

aser ana yiruja liasü.

Tesüba küm ana tsüngda Fulani teloki Chikun County kübok Khristan yim 12 samatsüogo aser ibaji ajanga Khristan 1,000 dak tema jenshia liasü.

January 10 nüa Kaura County nung Fulani teloki Kamaru Chawai yim amakdang Khristan asem tepset aser ka yiruja liasü.


United Kingdom All-Party Parliamentary Group for International Freedom or Belief (APPG) report ajanga ashiba agi, Boko Haram aser ISWAP [Islamic State West Africa Province]-i

Khristantem anema inyakba ama Fulani telokia Khristantem anema inyaker.

Yaküm December 10 nü International Criminal Court prosecutor, Fatou Bensouda-i sangdong ka ajanga Nigeria linük nung meimchir temeden anema inyakba mapatem bushi-süngdangtsü ayongzüka liasü.



## OLONG PAITEP # 5715



### TIPIEN

1. Balaka
6. Aika shirangba
7. Tar tatsü
9. Nenü'er jabaso
10. Sen latettsüba
11. Tangar kübok alir
14. Lon nung inokba
15. Tzü ayimdak
16. Ajok

### LANGTSÜNGLEN

2. Hai sür inyak
3. Aor tenüng ka
4. Ali telungi talangka lur
5. Tebang kenyongi mazüoker
8. Ken atema anenzükertem
9. Toktepa noktak
10. Sen
11. Benjong agi
12. Telung nung rizünga ayu
13. Tebang nung enok

## OLONG PAITEP # 5714 TELANGZÜBA

### TIPIEN :

1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

### LANGTSÜNGLEN :

1. Aruli, 3. Balala, 5. Suwar, 6. Belem,
9. Sükak, 10. Aonung, 11. Dokan,
13. Tinu.



### CLASS ROOM NUNG :



- Missla** : Alokba! kidang aliba shiruru tenüng kar shiangjung.
- Alokba** : Monila, pussyla, Danü aser obala.
- Missla** : Aree kodashür nübojia shiruru rongnung züngoker?
- Alokba** : Kübo malidangsa ojalai "nübo shiruru sangji" ta sa ashir ati!
- Missla** : Oh Alokba!!

- WhatsApp

## TANÜBO NAI LANGZÜANG

Q. Koba küm non-profit Signal Foundation tenzük?

- A. 2001      B. 2011      C. 2015      D. 2018

===== (Taruba adok nung onoki langzütsü)

YASHI ADOK TELANGZÜBA : Japan

## Happy Birthday

**TENÜNG** : T. TONGPANGSANGER LKR  
**Yim** : Changtongya  
**Talidak** : Lower Agri Kohima  
**Küm** : 3  
**Tasoba anogo** : 05/02/18

Temeim Sanger na küm asem junga anir aruba asoshi Tsüngrem nem tenüsang agütsür, na ita ti nung aso nungji mozüki nung yariteper ajaki magishitsü ta shiaka Tsüngremi akümlir nung züngsem, iyongji tanü asenok ajak pelateper, ano arishi anogo temjena moajangma ta sarasadentsür.

- Temeim Odi Changtonger, Aturi, Sentiya, baby Temjennaro aser kinunger ajaki tepela tasoba salem abener.



## NAI-A YA METETTER MA?

INDIA SHISHILEMBADAK GARI TMTIBAAYOKBATEM: JANUARY 2021

|                             |        |  |
|-----------------------------|--------|--|
| Maruti Suzuki Alto          | 18,260 |  |
| Maruti Suzuki Swift         | 17,180 |  |
| Maruti Suzuki Wagon R       | 17,165 |  |
| Maruti Suzuki Baleno        | 16,648 |  |
| Maruti Suzuki Dzire         | 15,125 |  |
| Hyundai Creta               | 12,284 |  |
| Hyundai Venue               | 11,779 |  |
| Maruti Suzuki Eeco          | 11,680 |  |
| Hyundai Grand i10 Nios      | 10,865 |  |
| Maruti Suzuki Vitara Brezza | 10,623 |  |

### SUDOKU # 5756

|   |   |   |   |   |   |   |   |   |
|---|---|---|---|---|---|---|---|---|
| 5 |   | 7 | 4 | 9 | 8 |   |   |   |
| 6 |   |   |   |   | 5 | 9 |   | 8 |
| 2 |   |   |   | 1 | 6 |   | 5 |   |
| 8 | 5 | 1 | 9 |   |   |   | 4 |   |
|   |   |   | 6 | 5 | 1 |   | 9 | 7 |
| 7 |   | 9 |   |   | 3 |   |   | 2 |
|   | 4 | 5 | 3 |   | 2 |   |   |   |
|   | 7 | 2 | 1 |   |   | 6 |   | 5 |
|   | 8 | 6 |   |   | 9 | 1 |   |   |

### TELANGZUBA # 5755

|   |   |   |   |   |   |   |   |   |
|---|---|---|---|---|---|---|---|---|
| 5 | 3 | 9 | 7 | 4 | 8 | 2 | 1 | 6 |
| 8 | 7 | 2 | 1 | 3 | 6 | 5 | 4 | 9 |
| 1 | 6 | 4 | 5 | 9 | 2 | 3 | 7 | 8 |
| 9 | 5 | 3 | 2 | 8 | 7 | 4 | 6 | 1 |
|   | 6 | 4 | 8 | 3 | 1 | 9 | 7 | 2 |
| 7 | 2 | 1 | 6 | 5 | 4 | 8 | 9 | 3 |
| 3 | 9 | 7 | 4 | 6 | 5 | 1 | 8 | 2 |
| 2 | 8 | 5 | 9 | 7 | 1 | 6 | 3 | 4 |
| 4 | 1 | 6 | 8 | 2 | 3 | 9 | 5 | 7 |

## OJANG LUTEP # 5303

|          |   |                      |
|----------|---|----------------------|
| IBKWEN   | : | <input type="text"/> |
| LIKU     | : | <input type="text"/> |
| BIDUSHIR | : | <input type="text"/> |
| BENPAIJI | : | <input type="text"/> |
| ULKI     | : | <input type="text"/> |
| SETAN    | : | <input type="text"/> |
| ANSÜGUT  | : | <input type="text"/> |
| NMALENG  | : | <input type="text"/> |
| ALBALA   | : | <input type="text"/> |
| POKLAER  | : | <input type="text"/> |

### OJANG LUTEP TELANGZÜBA # 5302

KARIBO TAMAKOK MESÜRA MAKSÜ MAREM TEMESÜPBA  
 CHIYUNGTSÜ CHIAJEMA TAKÜM RAKSAR

## TAN HOPTA ATEMA - KOMA SÜLA ?

Q. Nagaland nung COVID-19 vaccine ya taginür ajak nem angati agütsü nunga koma süla ?

Olong 20 shi nung February 05, 2021 tashi nung iba telangzüba ya onok dangi (e-mail - tiryimiyim@gmail.com) :  
 (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.





New Delhi, February 04, 2021: Brihostibarnü New Delhi nung aluyimertem longkak aitba tesem, Ghazipur arrtsülen Police-i tenokdangba ayuba noksa nung angur.

## Aluyimertem longkak aitba anentsü atema Centre-i inyaksüla: Shiv Sena

**Mumbai, February 04 (Agencies):** Brihostibarnü Shiv Sena-i Centre sorkar dang Delhi arrtsülen aluyimertem longkak aitba anendaktsütsü atema lenmang ka bushitsüla aser aluyimertem akhümtsümbua kidangi meyipa yoktsüla, ta metetdaksü.

Shiv Sena-i, "Aluyimertem meyrjang aika tesüba anogo 90 tashi Delhi arrtsülen lenmang nung amonger. Aluyimertem ajakji Hindu nunger lir.

Nenoki (sorkar) aluyimertem akhümtsümbua kidangi kodanga meyipa yoktsü?," ta asüngdang.

Sharjeel Usmani apuba dak

sendakba nung Shiv Sena-isa taoba mapang Maharashtra Chief minister Devendra Fadnavis aitsü.

"Fadnavis-i Sharjeel aputsü ayongzüker. Junga inyakogo Devendra! Nai sorkar indang 'Mann Ki Baat' atema jembiogo," ta Sena-i metetdaksü.

Mongolbarnü Fadnavis-i Maharashtra sorkar dang Aligarh Muslim University (AMU) alumnus Sharjeel Usmani-i tawa Elgar Parishad sentong nung Hindu nunger anema jembiba atema pa nem temerenshi tulu agüjang, ta mepishia liasü.

Fadnavis-i, January 30 nü

Pune nung sentong ka nung jembidang Usmani-i Hindu nunger anema jembiogo, aser ibaji tamangba lokti balala tsüngda rara adokdaksütsü nükjidong nung jembi, ta aija liasü.

Pune regional secretary, Bharatiya Yuva Janta Morcha, Pradip Gawade-i ken o ka agütsüba sülen Sharjeel Usmani anema Swargate Police Station, Pune nung FIR ka benokogo.

Bodhbarnü BJP state Tir, Chandrakant Patil-ia shidi ka ajanga Uttar Pradesh Chief Minister, Yogi Adityanath dang Usmani anema FIR ka benokang ta mepishia liasü.

## India-i IOR linüktem nem raraba hadir agütsütsü: Rajnath Singh

**New Delhi, February 04 (Agencies):** India linüki Indian Ocean Region (IOR) nung aliba linüktem nem missiles aser electronic warfare systems densema raraba hadir systems agütsütsü melunga lir, ta Brihostibarnü Union Defence Minister, Rajnath Singh-i metetdaksü.

IOR Defence Ministers' Conclave nung jembidang Rajnath-i, "India-i IOR linüktem nem Missile systems, Light Combat Aircrafts/Helicopters, Multi-Purpose Light Transport aircraft, Warship & Patrol Vessels, Artillery Gun systems, Tanks, Radars, Military Vehicles, Electronic Warfare Systems densema hadir systems balala agütsütsü melunga lir," ta metetdaksü.

Bengaluru nung IOR Seminar 'Building Collective Maritime Competence towards Security and Growth for All in the Region' omen nung ajemdaker agi.

Rajnath-i, "Onoki Indian Ocean nung longjemer amalitepa inyaker, item rongnung shilem agiba linüktem tsüngda defence Industry industrial tsütsü amalitepa inyaksü densema lir," ta ashi.

IOR linük aikati alima sabang nung toktepdar aser technologies tasen yangludar, item rongnung rong yanglutsü atema defence shipyards densema lir, aser iba atemaji amalitepa inyaksü koka lir, ta Union Minister-isa metetdaksü.

"Iba Conclave ya ken o jembiba ajungkettsütsü aser

amalitepa inyakba ajanga Indian Ocean Region nung tesünap den azükaru alitsü. IOR region nung linük tulutibaji India lir aser India nunger tzüyinkümji kilometer 7,500 tashi lir. Anungji IOR linüktem ajak amalitepa inyaksü, tesünap alitsü aser azükarutsü atema India-i tongtibang shilem agitsüla," ta paisa shisem.

"Asenok ajak lemsateptetbaji Indian Ocean lir. International shishilembaba aser transport atema iba ya kanga tongtibang, kechiyong alima nung rong tesadang shi iba lenmang nung jajar, khu abenba rong shilem asemsü nungi shilem ka jajar aser alima nung toztü abenba rong shilem asemsü nungi shilem ana jajar," ta paisa metetdaksü.



Bengaluru, February 04, 2021: Brihostibarnü Bengaluru nung Aero India 2021 tanabuba anogo nung exhibition stall ka nung India nungeri tang mezüng yangluba semi-stealth drone model ka sayaba noksa nung angur. Iba ya Combat Air Teaming System (CATS) ta ajaba indigenous programme shilem ka lir.

## India nung coronavirus tashidak agi doctor 734 süogo: IMA

**New Delhi, Tsüklai/February 04 (Agencies):** Rajya Sabha nung Centre sorkari, linük nung coronavirus tashidak agi tang tashi nung doctor 162 süogo, ta metetdaksüba sülen Indian Medical Association (IMA)-i, linük nung coronavirus tashidak agi doctor 734 süogo, aser iba nungjagi doctor 431 bo general practitioners lir, ta jangjashitsüogo.

IMA-isa, covid agi asür doctor tem kwi'ar jungjunga bushisüngdangtsü atema Centre sorkari high-power committee ka tentetsüla aser iba tashidak agi asür doctor jak nem tapet tetushi agütsütsüla, ta mepishia metetdaksü.

Mongolbarnü Rajya Sabha nung Minister of State for Health, Ashwini Kumar Choubey-i, tang tashi nung coronavirus tashidak agi doctor 162, nurse 107 nurses aser ASHA workers 44 süogo, ta metetdakja liasü.

Choubey dangi züluba shidi nung IMA Tir, J A Jayalal-i,

IMA-i sangdongba aser Centre-i sangdongba naji khenyongi balala, kechiyong IMA-i doctor 734 tashi coronavirus tashidak agi süogo ta metetdaksüogo, ta shia lir.

Iba dak alia coronavirus agi asür doctor tem rongnung doctor 25 bo arrshi küm 35 tekübokpurtem lir, ta shidi nungjisa shia lir.

"Case Fatality Ratio ji doctor tem timba lir, ajisüaka parnoki linük nüburtem maneni tenzükogo. India sorkari ibaji magizükteter aser tim tetushi magütsür," ta shidi nung shia lir.

Indian Medical Association (IMA)-isa sorkari iba osang junga mebendenba den külemi asür kibongtem nem senotsü teyari menoa magütsüba atema sorkar aitsü.

"Doctor tem asüba osang tejangja bushitsü atema onoki sorkar dang high-power committee ka tentetsü mepishir aser iba tashidak agi asür (doctor tem) ajak nem tetushi agütsütsü mepishir," ta IMA Tiri züluba shidi nung shia lir.



Patna, February 04, 2021: Brihostibarnü World Cancer Day anogomong nung Bihar yimtiba, Patna nung cancer awareness agütsütsü atema ayongzükba sentong nung lanurtemi shilem agia asemtepba noksa nung angur.

## Delhi Police-i Greta Thunberg anema FIR ka benokogo

**New Delhi, Tsüklai/February 04 (Agencies):** Climate activist, Greta Thunberg-i India nung aluyimertemi longkak aitba onük nung 'toolkit' ka lemsatepba atema Brihostibarnü Delhi Police-i la anema FIR ka benokogo.

Arrshi küm 18, Thunberg-i la indang twitter account ajanga toolkit lemsatepba sülen ghonda ishika dang lirbo lai 'delete' asü.

Toolkit document ji aikati ashishiba sülen lai ibaji delete asü, ajisüaka Brihostibarnü Thunberg-i aluyimertemi tesünap nung longkak aibaji lai pusemer; online ajanga aikati la aitsür, ajisüaka ibaji ajanga la tangatetba memelenshi, ta metetdaksü.

"Brihostibarnü lai twitter ajanga, "Ni maneni aluyimertem pusemer aser parnoki tesünap nung longkak aibaji ni pusemer. Tesempa, amokmeren mesüra meimchir temeden anema inyakaka kü tangatetba

memelenshitsü," ta metetdaksü.

Bodhbarnü Sweden tsür, Thunberg-i India nung longkak aiter aluyimertem yaritsü melungertem atema toolkit ka lemsatepa liasü.

Toolkit ya document ka lir, aser iba toolkit nung Twitter storm ka tenzükba aser India nung aliba Indian embassies nung aluyimertem pusema longkak aittsü densema aluyimertem lenla balala ajanga yaritsü atema shia lir.

Greta Thunberg dang masü saka nüngtugu kentener, Rihanna aser US tatong Tir, Kamala Harris'er kinünger ka densema International celebrities aikati aluyimertem pusema tweet süogo. Iba sülen Bollywood actors- Ajay Devgn, Akshay Kumar, cricketer asayartem- Virat Kohli aser Sachin Tendulkar, kentener Lata Mangeshkar nungeri twitter ajanga India dang longjema alitsü ayongzüker.





Frankfurt, Germany anasa Nidderau nung rü yimsa aoba aser tzünglu aruba ajanga tzümetsüung adoka alidak train ka ajanga aoba noksa nung angur. Tzünglu tanen makai aruba aser rü yimsa aoba ajanga region aika nung timtem tali ajurutsü, ta ketdangsürtemi tekümdangtsü osangtem sangdongogo.

## 2002 küm PM Hasina indang convoy amaker tepuokdak ayur

**Dhaka, Tsüklai/February 04 (Agencies):** Küm 20 shi tejakdang tang ato kilonser teinyakdak alila meinba gari nung amakba mechi Bangladesh court kati opposition activist 50 küm ter tepuokdak ayutsü obendang agütsü.

Item rongnung Bangladesh Nationalist Party (BNP) nungi Parliament züngsem ka dena liasü. Iba lendong atalokba mapang Bangladesh Nationalist Party ya sorkar nung liasü.

2002 küm Sheikh Hasina meinba motorcade ka dang long agi aon, süng agi atep aser nok agi lepa liasü, ta prosecutor temi ashir. Iba mapang Sheikh Hasina ya opposition lenir liasü.

"Taoba MP densema nisung asem nem küm ter tepuokdak ayutsü obendang agütsü aser tanüngertem ya küm pezü ser tesadang nungi tenzüka tepuokdak küm balala ayutsü obendang agütsü," ta Satkhira nung district court kati obendang agütsüba sülen prosecutor Shaheen Mirdha-i Brehostibarnü osangbener dang ashir.

Iba ken o nung aija alir nisung 12 tang tashi jenshia senzür.

Hasina tepsettsü merangba maparen aika rongnung iba lendong ya ka lir, ta prosecutor temi ashir, kong la meyiru.

Iba lendong nung lar Awami League züngsem aser osangbenertem aika yirua liasü.

Opposition BNP ajanga osang sangdonga mali.

BNP lenir aser Hasina den tokteper Khaleda Zia ya ochimashi maparen nung 2018 nung küm 17 atema tepuokdak yua lir. 2002 lendong mapang Zia ya ato kilonser inyaka liasü.

Hasina-i küm 12 yimsü süa aruba mapang sorkari par activist meyirijang ter dak tema puogo, ta BNP ajanga aitsür.

2004 küm Hasina indang rally ka nung grenade amshia amakba nung shilem agiba mechi Zia'er jabaso Tarique Rahman ya taküm tepiyong tepuokdak ayutsü, ta 2018 küm obendang agütsü.

Iba ken o nung nisung 19 nem tasüba temerenshi agütsüogo.

## International Criminal Court-i Uganda LRA lenir Ongwen aitsü

**The Hague, Tsüklai/February 04 (Agencies):** Rara mapang mapa tamajung inyakba aser meimchir anema mapa tamajung inyakba atema International Criminal Court ajanga Uganda nunger tanur asüandang sepai aliba nungi Lord's Resistance Army (LRA) indang tanishir akumsang aitsü.

2000s tetenzüklen nisung tepsetba, tesem ajungalen tashiyim agi shi nung medemba, alar ama amshiba, tanurtem pua bener aoba, reshikangshia amshiba aser rara mapang auyaba ken o dak sendakba nung arishi küm 45 tain Dominic Ongwen-i 61 ben aibelen a liasü, ta Netherlands nung aliba court ajanga Brehostibarnü bushitet.

Ongwen ya tanur asüandang LRA ajanga pua bener ao, aser pai tetsür asem tashiyim amshia mashisa kumtsüba atema The Hague nung aliba obendanger temi aija liasü.

2002 aser 2005 tsüngta Ongwen-i molungsoa item mapa tamajung ya inyak, ta okadak obendanger temi ashir.

"Dominic Ongwen-i mapa tamajung inyakba nung pa temeden angutsü mali. Pai aibelenba ya tarendakba makai shitettsü," ta presiding Judge Bertram Schmitt-i obendang agütsüba mapang ashir.

Ongwen ya taküm tepiyong tepuokdak ayutsü, saka obendangertemi pa nem temerenshi agütsüba ano mashi.

Pa tanur asüandang pua bener aoba ajanga tekolok

shisatsü nung timtem ajurua liasü, anungji pa nem temerenshi magütsütsüla, ta pa indang okatsürtemi ashir.

Saka iba ken o ya Dominic Ongwen tain kumer LRA tanishir ka ama inyakba indang lir, ta Schmitt-i ashir.

Sorkar anema nokdaker Joseph Kony lenisüba kübok LRA ajanga Uganda nunger küm 20 jungnüa reshikangshia aru. Iba mapang LRA ya tang South Sudan, Democratic Republic of Congo aser Central African Republic kumteter aliba tesemtem nung amenoker Tir Yoweri Museveni indang sorkar den rara liasü.

2004 küm Uganda sorkari LRA den raraba ya ICC dangi aben, koba raraba mapang mapa tamajung inyakba, meimchir anema mapa tamajung inyakba aser kin samatsütsü merangba maparen atema alima nung bangdak tematiba lir.

Iba azüdokshi mapang LRA ajanga nisung 100,000 dak tema tepset aser tanur 60,000 pua bener ao, ta United Nations ajanga ashir.

Mitkartem kanga sashia nokdakba ajanga iba telungpur telok ya 2005 küm Uganda nungi aridok aser iba züngsem ya central Africa tesem balala nung prokshi.

2015 küm Central African Republic nung US special forces ya Kony bushiba mapang Ongwen-i parnok nem bendanga agütsü aser ken o jembitsü atema ICC dangi yoka liasü.

## Myanmar mitkari Facebook shibangtsüogo

**Naypyidaw, Tsüklai/February 04 (Agencies):** Myanmar mitkartemi linük nung rongrongshirong malitsü tenüng nung Brehostibarnü Facebook shibangtsüogo aser activist temi ashiba agi, election ajanga shimteta Aung San Suu Kyi atsüngdokba anema yimtung nung longkak aiter nisung asem puogo.

Hombarnü mitkartemi sorkar atsüngdokba sülen Nobel Peace sempet angur Suu Kyi-i ozüing alema bendanglen nungi osang agitepba osettsüset bener aru, ta aitsür aser iba yongji anüolen linüktemi aitsür aser mitkartem dang November election nung lar teloki takok anguba akhumtsüputsüla, ta ashir.

Mitkar anemertemi Facebook nung kanga tashi ita nokdaker, koba Myanmar indang internet sapang tongtiba lir aser shishilempaba aser sorkar atema osangtsüasang agiba tesem tongtipang ka lir. Facebook indang WhatsApp messaging-

a shibangtsüogo.

Facebook ya tesem kar nung amshiteter aser longkak aitertemi Mandalay yimti nung iba sapang amshia livestream asü. Longkak aiter anema azüdokshiba otsü aliba linük, Myanmar nung mitkar tashi amshia sorkar atsüngdokba sülen yimtung nung longkak aitba ibai mezüngbuba alitsü.

Banner ka nung "Mitkar tashi amshia sorkar atsüngdokba anema nüburtemi longkak aiter," ta zülua liasü.

Nisung 20 shi aliba telok kati, "Ozü lenirtem pua aliba tangsa chiokang," ta ayimtena liasü.

Longkak aitba sülen nisung asem apu, ta kaketshir tentet balala aseme ashir.

Linük tesem ajungalen sorkar indang mozüki nung inyakertemi tashi mangaba campaign ka tenzüka indang noksatema social network nung prokshia liasü, kong doctor temi mapa inyakba anen mesüra Suu Kyi'er National League for Democracy indang sentsü

temerem ribbon agia liasü.

Agriculture ministry nung inyakertemia iba campaign nung shilem agiba indang noksatem Bodhbarnü prokshia liasü.

Tesem balala nung nüburtem jashiba temaitsü sayur. Yangon aser danga yimtitem nung aliba nüburtemi aonung ana tashi chipo-aonpo akoshiba aser gari indang horn agütsüba noksatem Facebook nung prokshia liasü.

"Tammang nung tesangwa remshitar. Tim yimya nung mesüi mitkar tashi amshia sorkar atsüngdokba anema nübur kwi ali, ta asenoki sayutsü nungdaker," ta taoba mapang mitkartemi yimsü asüba anema nokdaker tejen nübu, Min Ko Naing-i ashir.

Taila osang aser tim masüba osangtem prokshia mangatetep adokdaksüba mechi Facebook ya February 7 tashi shibangtsü, ta Ministry of Communications and Information ajanga ashir. Myanmar nütsüng yongsük million 53 dak tema aliba nungi tesadang kati Facebook ya

amshir.

Suu Kyi dang külem party nung lenir dangatem den külemi apuba sülen nüburtemi khien danga ngudanga mali.

November 8 nü election agiba nung NLD ajanga vote shilem 80 shi angu, ta election commission ajanga ashir, koba mitkartemi agizüktsü memolunger aser kuli tejangja mesayuteti ashikülak mapa inyakogo, ta aitsür.

Nüburtemi aginüba ama inyaktsü atema linük balala den jembishinüa inyakteptsü, ta United Nations ajanga ashir.

Myanmar nung mitkar tashi amshia sorkar atsüngdokba tebilemtsü ya United States atema tongtipang lir iba melen tenokdangba agütsütsü asoshi Washington-i asameyangba mapang lir, ta White House-i Bodhbarnü metetdaksü.

Tir Joe Biden-i South Korea aser Australia lenirtem den iba tensa indang jembiogo, ta White House-i ashir.

Suu Kyi anema ken o

benokba ya tamashi mapa ka lir, ta ASEAN (Association of Southeast Asian Nations) Parliamentarians for Human Rights indang mendenpuba Charles Santiago-i ashir.

Naypyidaw nung Suu Kyi'er ki mita bushiba mapang ngutetba walkie-talkie radio trok ya ozüing alema bendanglen nungi bener aruba lir aser temelaba magie amshi, ta police temi ashir.

Suu Kyi-i linük indang democracy movement anir nokdakba mapang 1989 aser 2010 tsüngta la küm 15 shi kidang pua ayu.

Myanmar nung 1962 nungi mitkartemi yimsü süa arur 2015 küm Suu Kyi'er party sorkar tentet, saka yangjia mitkar tanishirtemi shilem tulu agia liasü.

Army chief General Min Aung Hlaing-i aniba mitkartemi Myanmar nung küm ka atema state of emergency sangdongogo aser timi election agitsü nangzük, saka mapang latetja mali.



## CRPF Manipur & Nagaland sector IGP Dutta-i teyari agütsü



Kohima, Tsüklai/February 04, 2021: Brehostibarnü, Sechu Zubza nung Civic Action Programme (CAP) agiba mapang, CRPF Manipur & Nagaland sector IGP Randeep Datta den pa kinungtsü Ritu Datta aser tangartem külemi tangokba noksa ka yangi angur.

**Kohima, Tsüklai/February 04, 2021 (TYO):** Kohima district kübok Sechu Zubza nung 78th CRPF Battalion indang Civic Action Programme (CAP) dak sendakba nung, Central Reserve Police Force (CRPF) Manipur & Nagaland sector, Inspector General of Police (IGP) Randeep Datta Nagaland tonga arua lir, ta sangdong ka ajanga metetdaksü.

Nagaland nung 78th CRPF Battalion tenzükba mapang nungi, CAP mapatong ajanga iba battalion yagi yimya balala nung nüburtem yari arudar.

Sechu Zubza nung, CAP sentong nung matendang, Kohima nung Datta-i Nagaland chief minister Neiphiu Rio den

ajurutep aser state nung security tensa aser police aser nübur tsüngda tesendaktep tali akangshitsü asadangshia jembi.

Kasa mapang, Datta-i Nagaland indang chief secretary J. Alam den ajurutep.

Sechu Zubza nung CAP function agiba mapang, Datta-i nüburtem nem water storage tank, study materials aser solar led light tem lema agütsü.

2020-21 mapang CAP kübok agütsüba osetsüsettem rongnung; Sechu Zubza indang Sechuma, Leizha B Colony aser Kherithi B Colony nung nüngdakba nüburtem nem water storage tank 81, Government Primary School Sechu Zubza nung kaketshirtem nem study

material set 151 aser Sechu Zubza/ Sechuma village road nungi Don Bosco school road tashi inoktsü atema poles den Solar Led Lights 10 densema lir.

Datta-i Nagaland nung alir nübur sobaliba ya balaka aser tenükshitsü ka lir, ta metetdaksü.

Pai ashiba agi, India Sorkar den külemi CRPF-i lenla balala nung nüburtem yaritsü renema dang lir.

Kasa sentong nung, Randeep Datta kinungtsü aser CRPF Wives Welfare Association, Manipur & Nagaland indang president, Ritu Datta-ia, nüburtem tsüngda yimjung ya ajak dang tongtibtangtiba lir, anungji lokti nung yimjiyimjung alitsü asoshi kati ka meimtepa alitsü asoshi ajungshi.

Shyamchand De, DIGP (Ops), CRPF Kohima-i, CRPF-i teti nübur den amalitepa inyaksangshitsü aser parnok nem lemezüksüba maparen dak alaka, lenmang balala nung yaritepa alitsü asoshi nangzük.

CRPF den tesendaktep tajung ayuba aser longjemer inyakba atema Surender Singh, Commandant 78 CRPF Battalion-i kidanger yimtsüngtem dang pelaba metetdaksüogo.

## Finance Commission-i Tripura atema sen crore 875 agizükogo

**Agartala, Tsüklai/February 4 (Agencies):** Tripura nung terenlok maparen balala atema 15th Finance Commission-i sen crore 875 agizükogo.

Kasa mapang nung senotsü teyari agütsüba atema Tripura chief minister Biplab Kumar Deb-i Ato Kilonser Narendra Modi aser Centre sorkar dang kanga pelaba lemsatepogo.

Biplab Kumar Deb-i, "Tripura atema lemezüksüba senotsü ajanga water supply project tem benoka inyakba aser state nung infrastructure terenlok nung teyari agütsütsü. Iba ajanga tourism sector terenlok nunga teyari agütsütsü," ta ashi.

"Iba ya state terenlok nung kanga tongtibtang alizüng ka

asütsü," ta paisa ashi.

15th Finance Commission-i, Champaknagar aser Champaichhara nung tzünokdang ana yanglutsü atema sen crore 400 agizükogo.

Iba ajanga Agartala municipal tesem aser iba temeket nung aliba tesemtem nem tajemtsü tzü timba agütsütsü.

Tzünokdang yangluba ajanga lanurtem nem mapa inyaksü asoshi maongka agütsütsü.

Kasa mapang nung tourism sector terenlok atema sen crore 175 lemezüksüogo, kong Matabari Tripureswari temple kübok Shaktipeeth nung ropeway ka aser Neermahal nung sound aser light show project ka yanglutsüba

densema lir.

State sorkarisa sorkar office balala kilem kati aيتدaksütsü atema sen crore 100 intoka ki ka yanglutsü.

Iba ajanga department tem tsüngda tangatettep tajungba akümtsü aser nüburtem nema anisüngzük agütsütsü.

Khowai, Bishramganj, Ambasa, Bilonia aser Kailashahar district headquarters tem nem, kilentsü, solid waste management aser yimtung nung light inoktsüba amala terenlok maparen balala inyaksü atema sen crore 25 (ajak nem) agütsütsü.

Kasaji Dharmanagar aser Udaipur nunga terenlok maparen atema sen crore 75 lemezüksüogo.

## Assam-Mizoram arrtsü anasa Hailakandi nung school ka poksatsü

**Guwahati, Tsüklai/February 4 (Agencies):** Assam-Mizoram arrtsü len Hailakandi nung bomb ana pokdaksüba sülen primary school ka raksatsü.

Mejangjaba nisungtemi Assam kübok Hailakandi tesem nung amenoker aliba Lower Primary School ka nung bomb ana pokdaksü.

Iba school ya Assam-Mizoram Inter-State arrtsü anasa Ramnathpur Police Station nungi kilometer 12 pilar lir.

Bomb ana pokdaksüba sülen school kanga mejungi poksa aser tajemtsü tzü bendena ayuba tank ka dena poksatsü.

Teburtem metsümeshidak,

koba tang teyangludak liasü, iba metsümeshidaka kanga mejungi poksatsü.

Tang tashi nung iba lendong nung nisung yiruba osangbo kecha mali.

Kasa mapang nung Hailakandi police aser district administration-i iba ken o bushitsüngdang tenzükogo. Ajisüaka bomb pokdaksürtem maitsü tang tashi mejangjai lir.

Iba lendong atalokba sülen iba tesem nung security tali akangshiogo.

Ken o dak sendakba nung Assam Jatiyatabadi Yuva Chatra Parishad (AJYCP)-i BJP-i aniba Assam sorkar aitsüogo.

AJYCP-i ashiba agi, Assam

sorkari Mizoram den arrtsü nung mangatettep aliba mapang shidak nung anepalu masüba ajanga state ana tsüngda arrtsü nung mapangshia iba amala lendong ataloker.

Temetetsükaji Assam kübok Cachar district nung alirtem aser Mizoram kübok Kolasib district nung alirtem tsüngda taoba küm October aser November ita mangatettep adoka liasü.

Anogo aika mangatettep adoka raratepba sülen telok anaprongla nungi nisung aika yirua liasü.

Ajisüaka Assam aser Mizoram nungi ketdangsürtemi Chief Secretary jenjang nung dena maneni sensak asemba ajanga tensa aziükteta aruogo.

GOVERNMENT OF NAGALAND  
DIRECTORATE OF TECHNICAL EDUCATION  
NAGALAND: KOHIMA  
NO. DTE/ SCHO-10/2019/  
Dt. Kohima, the Feb 2021.

NOTIFICATION  
In continuation to this office Notification No.DTE/ TECH-3/2005 dated 3rd Dec 2020, it is to inform all the students belonging to the Indigenous and Schedule Tribes of Nagaland that the invitation of online application for State Technical Scholarship scheme has been extended till 28th Feb.2021.  
Students who have not registered or applied for the said scholarship scheme can apply from the common scholarship portal [www.scholarship.nagaland.gov.in](http://www.scholarship.nagaland.gov.in)  
**(ER. Vipulhou Lhoungu)**  
**Joint Director**

Issued by DIPR

Ni **Mr. Temsuakum**, ni 17<sup>th</sup> January 2021 anogo 7:51 pm nung Yaongyimsen guy's are 35% shitem mait ta prokshiogo, aji ni meypa agir.

  
**Mr. Temsuakum (9863029448)**

## 2021 Benelli TRK 502 sayaogo



**New Delhi, Tsüklai/February 04, 2021 (Agencies):** India shishilembadak Benelli India-i BS-VI emission-norm compliant version - TRK 502 adventure motorcycle sayaba sangdongogo. Iba motorcycle sen lakh 4.80 alitsü aser Metallic Dark Grey sentsü nung angutsü.

Ano külen, Pure White aser Red colour jenjang sen lakh 4.90 ( ex-showroom, pan-India) asütsü. Iba den bendenloksema, Benelli-i küm 3-year unlimited km warranty agütsütsü terenemba lir.

Tejangrartemi, Benelli India dealership ajanga sen 10,000 agütsür Benelli TRK 502 mekaa ayutsü akok.

"BS-VI norms nung ajemoka, iba premium touring segment nung Company tsüngsü tali dang akangshia aotsü onoki imlaa atar. Taküm küm BS-VI format nung onoki model aika bendenloktsü aser tongtibtangsa dealership tem ulushitsü asoshi onoki meranga inyaksü aser iba mapatong ajanga Benelli portfolio nung biking jangrartem atema tajangzük ngudaksütsü," ta Vikas Jhabakh, Managing Director,

Benelli India-i ashi.

Company sangdong ajanga angazükba agi, temzüng agi melaba ama BS-VI agi melener asünung, taoba model dang nungi Benelli TRK 502 tasenba ya kanga agi tajungba (Engine refinement) alitsü. Iba Motorcycle engine tasazük 500cc liquid-cooled twin-cylinder engine lir, koba ajanga 47.5 PS power asrr 46 Nm of torque agütsür. Iba den külemi engine inyakyim ya six-speed gearbox ajanga achaayangtsür.

Benelli TRK 502 nung steel trellis frame, 20-litre fuel tank, switchable ABS aser backlit switch cluster den instrument cluster tasen inoka yanglutsüogo.

Ano külen, motorcycle nung rearview mirrors tajungba inoktsüogo ta Benelli-i ashi. Tanga feature tsütsü reprangdangra, iba motorcycle nung knuckle guard tasen, koba taoba model nung keta aliba dang nungi takangba aser handlebar sentsü tanak agi melentsüogo.

Maneni, Benelli TRK 502 nung, cast aluminium rear box bracket aser double-threaded seat tasen angutsü.



## Australian Open renemer aliba ama asayatsü: Craig Tiley



**Melbourne, Tsüklai/February 04, 2021**

**(Agencies):** Asayartem aser parnok den teyaritepertem quarantine süa amungba Melbourne hotel ka nung inyaker ka dak coronavirus tashidak tejangja putet yongjia, renemba ama, Australian Open asayamung Hombar nungi tenzüksü, ta Brehostibarnü, tournament director Craig Tiley-i ashi.

Bodhbhar anogo tesü, Melbourne hotel ka nung inyaker ka dak iba tashidak putetba osang sangdongba sülen, Brehostibarnü Melbourne Park nung warm-up asayatem thitsü aser Grand Hyatt hotel nung quarantine süa amungertem dang COVID-19 atema tendangtsü aser iba test osang magütsü tashi shinga den majurutepi amungtsü atema tetuyuba agütsüogo.

"Renema aliba ama, Australian Open asayamung asayatsü teimla lir. Onoki iba asayamung Hombar nungi tenzüka asayatsü," ta Melbourne nung Tiley-i osangbener dang ashi.

Tiley-i ashiba agi, nisung 507 nungi asayar 160 shi Brehostibar nikongdang tashi Covid-19 test agiba maparen atemtsü. Parnok indang Covid-19 test negative putetra, asayartem Grand Slam tesem nung warm-up asaya trok nung shilem agitsü asoshi melatsü, koba anogo 14 quarantine nung muner sülen, iba warm-up event ya parnok atema asaya renemshiba ama alitsü.

"Ibaji ajanga asayamung tenzüksü aliba tejakdang, renemshitsü atema anogo asem tashi agütsü," ta Grand Slam asayamung atema draw asaya Brehostibar nungi Hokolbar

anogo melenshitsü ta osang agütsüba mapang Tiley-i shisem.

Taoba nung, Victoria state health ketdangsürtemi ashiba agi, tekümdangtsü mera agitsü atema tennis asayar aser parnok den teyaritepertem Covid-19 atema tendang.

\*Tetsürtem warm-up asaya tatsüba kümtsür:

Hokolbarnü (05.02.2021) nungi tenzüka Australian Open tuneups nung tetsürtem asaya tajemba kümtsütsü. Brehostibarnü, Melbourne kübok Hyatt Hotel nung inyaker ka dak coronavirus tashidak putetba sülen, fixture nung tetsükdaktsü adokba ajanga iba telemtetba ya agi.

Iba hotel nung inyaker ka dak Covid-19 tashidak putetba ajanga, aruya aliba Hombar nungi taküm indang mezüng tennis asayamung metenzükdang, warm-up event anogo asem nung asayatsü asoshi Tennis Australia (TA) achaayangertem lemtet.

"Hokolbarnü nungi WTA single asaya ajak 'best of two' regular tie break sets den final set nüngdakra 10 point match tie break asayatsü," ta Hokolbar atema fixture sayaba nung TA-i shai lir.

Tebur warm-up asayatem renemba ama, final set nung tiebreak (6-6 nung) densema best-of-three sets format nung asayatsü.

## DC Mon ajanga District Task Force senden ayonger

**Dimapur, Tsüklai/February 04 (TYO):**

District nung COVID-19 mozü agütsüba maparen tajungtiba nung inyaksü aser ketdangsütsü atema Deputy Commissioner, Mon, Thavaseelan K IAS ajanga District Task Force Mon indang senden ka February 08,

2021 anüngdang 12:30 ako nung Deputy Commissioner, Mon indang Conference Hall nung jazüka lir.

Iba senden nung District Task Force Mon indang züngsem ajunga medema arua adentsü metetdaktür, ta sangdong ajanga ashi.

## Feb. 10 nungi Tizu Area Sports Association sports meet tenzüksü

**Phek, Tsüklai/February 04, 2021 (TYO):**

Kutsapo Village nung February 10 nungi February 16, 2021 tashi 58buba Tizu Area Sports Association sports meet ayongzüksü. Iba meet lapokba sentong nung 19 A/

C MLA Kuzholuzo Nienu tongti tesemdang aser Shetsoyi Chizo, President, Tizu Area Public Welfare Organization tetushi tesemdang ama arua adentsü, ta sangdong ka ajanga metetdaktür.

## Moussa dak Covid-19 putet



Dembele, shiba taoba ita French Ligue 1 telok Olympique Lyonnais nungi loan nungi Atletico-i aru, pa densema külem team pur forward Joao Felix, defender Mario Hermoso aser winger Yannick Carrasco nunger dak iba tesashi wara puteta lir.

League indang temzüng agi melaba ama, arishi küm 24 tain Dembele ya par kidang shinga den majurutepi mungdar. Asayar pezü ya Hombar nungi Celta Vigo aser Atlético Madrid na asaya nung shilem magitettsü.

Tang, La Liga table nung, Atletico pur asaya 19 nungi point 50 ngua lir aser point 10 agi Barcelona aser Real Madrid tejakdang kümogo.

**Tsüklai/February 04, 2021**

**(Agencies):** Atletico Madrid indang loan nung anioksang France nunger forward Moussa Dembele dak COVID-19 tashidak aliba tejangja puteta, taoba hopta Spain indang team nung iba tashidak puteter rongnung pa asayar pezübuba kümogo, ta Brehostibarnü La Liga table temaba jenjang nung alir club-i ashi.

# Copa del Rey: Barcelona semi final-i iogo

**Granada, Tsüklai/February 04, 2021 (Agencies):**

Copa del Rey asayamung semifinal tongtettsü atema, Bodhbarnü (03.02.2021) Barcelona-i Granada madak goal 5-3 agi takok angu. Antoine Griezmann-i Barcelona atema goal ana idaktsü.

Telok ana tsüngda asaya atemtsü minute 2 lia, Barcelona pur goal ana agi Granada memenep liasü, saka parnoki takoker telok ka ama teimla mesamai junga asayatet.

Lionel Messi teyari ajanga Barca teloki goal ana idakja iba asaya koktet, koba season tanabuba nung parnoki takok angutsü asoshi fans nem teimla ka agütsür.

"Iba asaya kanga tulu liasü, Taoba asaya nung goal 2-0 agi tamakok ngur sülen, temulungtetba tulu sayuba ya tesüngmangtsüka. Tan season nung iba takok ya team pur atema temelenshi tuluka asütsü akok. Team-i iba ama asaya yimya sayuba atema nümatanga bilemer," ta Barcelona coach Ronald Koeman-i ashi.

Iba asaya nung Messi teyari ajanga Antoine Griezmann aser

Jordi Alba nati goal ka ka meinoktsüdang, minute 88buba tashi Barcelona pur goal 2-0 agi Granada tesülen ser asaya liasü.

Mapang talila apuloktsür asayaba mapang, Barcelona pur kanga kara asaya, kong minute 100buba nung Griezmann-i pa indang goal tanabuba tongokja goal 3-2 agi Granada tejakdang aküm, saka America nunger defender Sergiño Dest-i asaya dak mapet yimya benshiba ajanga, minute asem sülen Granada-i penalty ka metsütsü maongka angu, koba Fede Vico-i iba penalty idakja telok ana tsüngda goal kasa shi aküm.

Messi-i metsüba goal ka nokdangba sülen, minute 108buba nung Frenkie de Jong-i goal ka idakja Barcelona 4-3 agi tejakdang kümadok. Iba sülen, Griezmann-i metsüküta yokba ball ka Alba-i agizüka minute 113buba nung Barca atema goal pungobuba idaktsü.

"Onok kanga timtema asayaogo. Tiaka, asaya tatemlen Frenkie-ia goal ka bendenloksüba ajanga asaya tepor junga tembang," ta Messi aser Alba na

den tongti shilem agia asayasang Griezmann-i ashi.

Deobarnü, Messi indang meimbanga aliba multimillion-dollar contract osang angazüka sülen, par teloki iba asaya akoker alitsü. Iba osang ajanga club sentsüh aliba aser taoba season nungi mangatetep adokba indang metetdaktür.

Barcelona-i taoba season nung title ka danga kokdanga mali, koba 2007-2008 nungi Barcelona team nung matalokdangba ka lir. Taoba küm Copa asayamung quarter final nung Barca pur tsükadok, koba küm tuku tashi atonga Semi-final tongtettsü aliba teimla tembangadok.

Granada pur tamakok ajanga season tanabuba atonga semi-final tongtettsü asoshi maongka raksadok.

Round of 32 nung third-division club Cornellá ajatetsü atema Barcelona-i mapang talila nüngdaka asayaogo. Taküm Spanish Super Cup asaya ana nunga Barca-i mapang talila asaya, kong semi-final nung parnoki Real Sociedad akok aser final nungbo Athletic Bilbao-i tsükdaktsü.

Bodhbarnü Barcelona aser Granada na asaya nung Barca defender Samuel Umtiti-i penalty area nung aibelenba sülen, minute 33 nung Robert Kenedy-i asaya ayonger team atema mezüng goal inoktsü. Taoba mapang Real Madrid nungi forward asayar Roberto Soldado-i minute 47buba nung Granada atema goal tanabuba bendenloksü.

Minute 88buba nung Messi-i metsüketa yokba ball Griezmann-i agizüka Catalan club atema mezüng goal meinoktsüdang, Francisco Trincão asee Ousmane Dembélé napronglai goal idaktsütsü merang, saka goal post nungang ondak. Penalty area telung nung Messi-isa tanaben Griezmann noktaka alilen ball metsülökja, pai (Griezmann) goal tasembuba inoktsü aser France nunger striker Griezmann teyari ajanga set up Alba-i pa indang mezüng goal idaktsü.

\* Levante-i goal 1-0 agi

**Villareal akok**

Kasa asayamung quarter final asaya tanga ka nung, Roger Martí-i minute 120buba nung goal ka idakja, Levante-i Villarreal madak goal 1-0 agi takok ngua semi-final-i iogo. Küm 86 nung Levante pur iba asayamung semi-final mezüngbuba tongteter alitsü.

1935 küm nungi Levante-i final four stage khien danga metongteti aru. Iba küm Sabadell-i Levante tsükdaktsü.

Unai Emery indang Villarreal, shirnoki asaya shilem timbaka amokbanga asaya, parnoki tanabenbuba semi-final tongtettsü nükla yur asaya liasü.

Tan season, Real Madrid aser Atlético Madrid naprongla mezüng round nung tsükadok.

Mongolbarnü, last four tongteter team rongnung Sevilla mezüng team aküm. Sevilla-i second-division club Almería tsükdakja iba stage tongtet. Real Betis aser Athletic na tsüngda tatembangbuba semifinal asayatsü.

**BILEMDANGANG**

**"Pei nüngdak Tsüngrem dang asüngdangra peritsür."**